

REGIONAL NEWS

HEADLINES:-

1. Ram chhunga Civil mite chawimawina sang, Padma Shri chu nizan khan President Droupadi Murmu-in TNT dintu Pu Sangthankima hnenah a hlan.
2. Mizoram State Project Monitoring Committee hna thawh chuan rah tha tam tak a chhuah ngei dawn tih Chief Minister Pu Lalduhoma'n a sawi.
3. Liqour policy scam-a sum chhehrelh thubuai avanga man Delhi Chief Minister Arvind Khejriwal chu Supreme Court-in ni 21 bail a phalsak.
4. Israel nena inzawmna nei sumdawng lawng lian Iran-in a hren meka chuang ve India mi 17 zinga panga te chu chhuah an ni.

<><><>

PADMA SHREE AWARDEE - SANGTHANKIMA

Ram chhunga Civil mite chawimawina sang, Padma Shri chu nizan khan President Droupadi Murmu-in TNT dintu Pu Sangthankima hnenah a hlan.

Akashvani Correspondent Isaac Zoramsanga nena an inkawmnaah Pu Sangthankima chuan Padma Shri chu a dawn turah a ngai ngai lo tih sawiin mi dang, amah aia phu tam tak an awm laia chawimawina ropui tak a dawng chu a lawm takzet tih sawiin a dawng dawn tih an hrih tumah pawh lo dawnsawn dan a thiam lo tih a sawi.

Pu Sangthankima chuan fahrah chanhaite tana a inpekna chhan chu Pathiana harhtharna a chan hnuah midangte tana rawngbawl duhna lian tak neiin, Pathian malsawmna a dawn chu midang ten hre ve se a duh avang a ni, a ti a. Mi dangte'n Pathian nei ve se a duh avangin TNT bul a ÷an tih a sawi bawk.

Pu Sangthankima chuan mi dang tana a inpeknaah harsatna a tawh changin Pathianin a tanpui thin avangin chauh chang a nei ngai lo, a ti a. Hripui len laiin harsatna tawh ve mah se anmahni vengtu a awm tlat avangin an dam leh mai thin, a ti a. Pathian hnathawh vangin midang atangin thilpek an dawng thin a, Aizawl khaw chhunga Kohhran hrang hrangah rinna thutiam an hnena pe thin mi 500 atanga 600 an nei, a ti a. A dam chungin mi bawrhsawm leh chanhaite leh Isua mamawhte tan inpek zel a tum thu leh a dam chhan chu mi dang tana inpek a ni tih sawiin a chhandamna chan chu Chhandam hlenna a ni a, Pension a awm ve loh avangin a dam chhunga kalpui a tum tih a sawi bawk.

Sorkar laipui chuan January ni 26 Republic Day khan kumin atana Civil mite chawimawina hrang hrang, Padma Shri, Padma Bhushan leh Padma Vibhushan dawng turte a puang a, Padma Shri dawng tur mi 34 zingah Mizoram atangin Pu Sangthankima hi a tel ve a ni.

Pu Sangthankima hian Thutak Nunpuitu Team (TNT) hi kum 1988, November ni 14 khan Champhai khuaah din in Aizawl, Lunglei, Kolasib, Champhai leh Tahan ah te heng enkawl na hmun hi TNT chuan Pu Sangthankima kaihruaina hnuaiah a kalpui mek a, TNT ah hian tun dinhmunah Aizawl ah mi 1810 awm in Lunglei District ah mi 748 an awm a, Kolasib ah mi 363 awmin Champhai District ah mi 364 enkawl mek an ni a, Tahan ah mi 250 awmin a vai hian Thutak Nunpuitu Team-ah hian mi 3535 an awm mek a ni.

<><><>

CM & HOME MINISTER CONGRATULATE SANGTHANKIMA

Chief Minister Pu Lalduhoma'n ram chhunga chawimawina sang, Padma Shree dawngtu Pu Sangthankima chu a lawmpui thu a sawi.

Social Media-ah a lawmpui thu hi sawiin Chief Minister chuan he chawimawina dawn hi a phu hle a ni, a ti a. Midangte tana a inpekna chu entawntlak a tih thu sawiin a hnathawh chu Zofate tana theihngilh tawh ngai loh tur rawngbawlna ropui a ni, a ti.

Home Minister Pu K. Sapdanga pawhin Padma Shree dawngtu Pu Sangthankima chu a lawmpui thu social media kaltlangin a sawi a. Pu Sangthankima ang pa chhuanawm leh ropui Mizoten an nei chu vanneihthlak a tih thu a sawi a ni.

<><><>

REFUGEE INFLUX

Tukin dar 2 vel leh vawiin chawhnu lam khan Bangladesh, Chittagong Hill Tracts atangin an sahimna zawngin mi 127 ten Lawngtlai District an lut.

Chittagong Hill Tracts-a Kuki Chin National Army ten thuneihna sang zawk an ngiatna kalzelah heng laia Zohnahtlak, Bawm hnam te chu an sahimna zawngin Lawngtlai District-ah engemawzat an lut tawh a, hun engemawchen raltlan lut thar hi tih-tham an awm loh hnuah tukin dar 2 vel khan Chhungkua 18, an vaiin mi 124 ten Lawngtlai District an lut a; vawiin chawhnu lam khan chhungkaw khat luh belh lehin tukin leh vawiina Bangladesh raltlan Lawngtlai District a lutte hi an vaiin mi 127 an ni.

Heng Bangladesh raltlan lut thar zinga mi 21 ten Khawmawi, Hruitezawl, Hmawngbu, Bungtlang South leh Vathuampui an pan a, a bak zawng chu Chamdur 'P' a an awm lailawkna tura ruahman Community Hall-ah awmtir rih an ni.

Lawngtlai DC Office chuan raltlan lut tharte hi a theih ang anga buaipuiin, Bungtlang South BDO Pu Samuel Lalmalsawma Sailo chuan a theih ang angin tul pawimawhte a bawhzui nghal bawk a, sorkar lam chuan raltlante mamawh hmasa phuhruk nan Buhfai leh Silpaulin engemawzat a pe nghal a, khawtlang hruaitute nen raltlante enkawlzui dan tur hi ruahmanna siam chhoh mek zel a ni.

Hetih lai hian Myanmar tualchung buaina chuan reh lam pan loin a zual zel a, tunhnaiah Chin state-a tih-luihnaa sipai tantir an duh loh avangin Lawngtlai District-ah raltlan mi 100 dawn an awm belh.

Thuneitute sawi danin raltlan zingah hian Lawngtlai District baka Khawzawl district pan mi 6 an awm a, tun hnaia lo lutte hi an vaiin mi 95 an ni a, Arakan Army-a tantir an duh loh vanga Mizoram lama rawn tlanche ta niin thudawna chuan a sawi.

Raltlante hi April ni 30 khan Hruitezawl-ah mi 47 an lo lut a, thudawnnain a sawi danin heng lo lutte hi naupang tak tak an ni a, Chin State-a Paletwa hmuna Arakan Army ten an sipaia tantir an nawr lui chu duh loin an rawn tlanche a ni.

Home Department in tun thla ni 4 thlenga a chhinchhiah dan chuan tun hnaia lo lut mi 95 te nen hian Mizoram chhungah Myanmar atanga raltlan mi Sing 3 Sang 4 leh 346 an awm mek a. Raltlan zinga mi Sing 1 Sang 7 leh 901 te chu raltlante awmna atana sak 'refugee camp' pawn lamah an awma, mi Sing 1 Sang 6 leh 445 te chu Mizoram chhunga district 7-a refugee camp-ah awm mekin refugee camp-a awm lo te hi in luah leh mahni chunghe ina awm an ni.

Raltlan zingah hian mipa 10,097 awmin hmeichhia 10,947 an awm mek a, an zingah hian naupang 13,302 an awm bawk.

<><><>

MIZORAM STATE PROJECT MONITORING COMTT.

Mizoram State Project Monitoring Committee hna thawh chuan rah tha tam tak a chhuah ngei dawn tih Chief Minister Pu Lalduhoma'n a sawi.

Mizoram State Project Monitoring Committee hi waviin khan an Chairman, Pu Lalduhoma hovin CM Conference Hall-ah an thukhawm a; tun hnaia hmasawna hnathawh an endikte an thlirho a. Hetah hian Vice Chairman Pu R. Lal Rinawma chuan tun hnai khan a hmuna tlawhin hmun hrang hrang an endik tih a sawi a. Lengpui Airport tihchangtlunna hnathawh mek leh Lengpui Motor Sports Project thawh mek te, Maumual Protective Home-a Brick Wall Boundary Fencing thawh te, Solid Waste Management Centre, Hualngohmuna thawh mek te leh Ropuiliani Freedom Fighter Museum, Kelsiha thawh mek chungchangahte report a pe a. A kalpui zel dan tur chipchiar an sawi zui a ni.

An thil hmuh te leh waviin an sawi khawmna behchhan hian a endiktu team hian rawtna mumal tak duang se, a mawhphurtu department lama thehluh ni se, an ti.

<><><>

WEATHER ALERT

Ruah leh thlipui vanga chhiatna tam zawk a thlen loh nan mipuite chu mahni in lama tawm turin Aizawl Meteorological Centre Director Sudheer Kumar Dwivedi-a'n a chah.

Akashvani Aizawl palai nen an inkawmnaah Aizawl Meteorological Centre Director chuan zaninah Mizoram hmun thenkhatah ruah tam tak leh tek bakah thlipui na tak thawk thei a ni, a ti a. Mizoram District zingah Aizawl, Lunglei, Mamit, Kolasib leh Serchhip te chu thlipui leh ruah tam tak dawng thei dinhmunah an ding tih sawiin fimkhur a ngai hle, a ti a. Thlipui hi chak taka thawk thei nia sawiin rial pawh tla thei dinhmunah a ding, a ti.

(Byte)

Sudheer Kumar Dwivedi-a chuan thlipui na tak thawk thei a nih avang hian mipuite chu an him zawk theih nan thingkung hnuaiah te awm lo tura a duh thu a sawi a. Mahni in luma awm theih hram chu a tha tih sawiin mi tin fimkhur turin a chah a ni.

<><><>

CHAMPHAI - ENVIRONMENT

Champhai Sub-Hqrs. YMA Kumpulan Sub-Comt. Office Bearer te leh Environment Forest & Climate Change Department, Champhai Forest Division țang dun chuan Champhai District-a Ngur khaw ram, Tiau, Bulfek kaia dan Iova lui dunga lung lak a awm leh awm loh an enfiah a. Enfiah a nih lai hian JCB hmanga Balu la mek an awm avangin tihtawptir nghal a ni.

Luidung enfiaha chhuak te hian Tiau lui dunga lung leh țhenel la thin te avanga chhehvel boruak chhe zel chu pawh an tih thu leh lui dunga cheng thin nungchate tan pawh nun khaw chhuah a harsat phah hle dawn tih an sawi.

EF&CC Department leh Sub-Hqrs. YMA Kumpulan Sub-Committee chuan Champhai District huam chhunga lui awm te chu Environmental Clearance la hmasa lo chuan tumahin khawl hmanga khawih lo turin a ngen a. Hei hi National Green Tribunal-in khapna a lo tih chhuah tawh te, Environment Protection Act-1986 leh Water (Prevention and Control of Pollution) Act 1974-in a khap tlat a nih thu an sawi bawk.

SC GRANT 21 DAYS BAIL CHU ARVIND KHEJRIWAL

Liquor policy scam-a sum chhehrelh thubuai avanga man Delhi Chief Minister Arvind Khejriwal chu Supreme Court-in ni 21 bail a pe. Supreme Court chuan Lok Sabha inthlan thawhsarihna vote thlak zawh tuk June ni 2 ah AAP hotupa hi inpe leh turin a hriattir a.

Pu Khejriwal-a hian Supreme Courtah hian Lok Sabha inthlan kal mekah Campaign a dil a. Supreme Court chuan Enforcement Directorate pawh Pu Khejriwal-a man hun an tih khawtlai chhan a zawt a. Justice Sanjiv Khanna leh Dipankar Datta te awmna bench chuan Enforcement Directorate chu kum 2022 August thla daiha Case Information Report awm tawh si kumin March ni 21 a an man chauh chu a chhan a zawt a ni.

<><><>

IRAN RELEASES FIVE OF 17 INDIAN SAILORS ON BOARD SEIZED ISRAELI-LINKED VESSEL

Israel nena inzawmna nei sumdawng lawnglian Iran-in a hren meka chuang ve India mi 17 zinga panga chu Iran-in a chhuah. Heng Indian pangate hi vawiin vek khan Iran atangin hruai chhuah an ni a. Indian Embassy chuan thuchhuah siamin heng mi hrente an chhuah theih nana Iran thuneituten Embassy leh Bandar Abbas-a Indian Consulate te tha taka an thawhpui theih avangin lawmthu a sawi a ni.

He bungraw phur lawnglian hi April ni 13 khan Iran chuan lo manin lawngah hian India mi 17 hnathawk an awm ve a. Union Ministry of External Affairs chuan heng mi 17 zinga pakhat chu him takin India-ah phurh haw tawh a ni a ti a, tuna hrena la awm mek midangte pawh an him a, hun reiloteah an contract thil a fel veleh an haw ve thei dawn niin a sawi. Hetihlai hian India-a Iran Ambassador Iraj Elahi chuan India mite hi man zingah an tel ve lo a, haw thei turin an zalen a ni a ti

<><><>